

# 1 PEDRO

## Nacharam hēsap Pedroou p'ã deepłitarr

**Chi p'ätarr.** Mag carta Pedroouta p'äjim. Hichdëuta hōrau hichig Jesús higwi “P'ājā hi dāi nłrrarrau” habaawai, hirua magłm Jesús k'augba chitłm ha hiek'ajim haajem (Jn. 13:36-38; 18:15-27). Hirua mag hiek'ajieb mamł, Jesuu deeu hi kōit Hēwandamag jëeuwi hewag hich hiek hłk'aju k'łłnjā warag hirigta jaau p'ajim haajem (Jn. 21:15-19). Mag Jesús k'augbam ha hiek'atarr gaaimua burrijieb mamł, Hechos gaai hoowain, burrba harrjō, hichdëu Jesús hiek hłk'atarr gaai nem hubag sim. Hich mag sim gaaimua chadcha hich Jesuu hi higwia hiek'atarrjō (Jn. 1:42), hichta Jerusalem iglesia hee chi pörk'a sīsijim haajem (Hch. 1-2).

**Chijā k'łłn hat'eeta p'äjī.** Mag carta judionaan hamachdëu Cristo hiek hłk'a narr gaaimua hidëu hamach k'ajap sībam gaaimua dłr wëtwi parhoob durr chaur nłnłd harr k'łłn hat'eeta p'äjim haajem (1:1). Mamł mag chi hłk'a narr k'łłn hee judionaan happajjā k'aba, judionaan k'abam k'łłnpata t'łnarr haawai, mak'łłn hat'eepata p'äjim haajem. Pedroou mag carta p'āawai “Babilonia” hee simuata p'äjim haajem (5:13). Mamł mag Babilonia hanłm chan Babilonia chaar k'aba, Romata chi hłk'a narr k'łłnau mag t'łr wai naajim hanaabá. Chi Romapienauta chi hłk'a nłm k'łłn hëudee mag hēk'aajerr haawai sīi bigawaapai deeu gaaita t'łr wai naajim haajem.

**K'an jawaag hajī.** Mag Pedroou mag hēsap p'ätarran, mag chik'am jua hōkgau dłr wēnłrram gaaimua dau haug wau narr haawai magłmjā higba hamachdëu hłk'a nłm gaaita warag hubł hapi jaunaa hīchab jāgwiata jāg dau hap'łł haju haai nł ha jawaag hajim. Maguata mag ham dau hap'łł durrum k'irjunaata hłrcha ham wawī sim (2:19-20; 3:14,17; 4:1,12-15,17,19; 5:9-10). Mag jaaupłitarr haawaita hīs hewagjā mag librodam gaai t'łłrwai maadëu k'ap'ł nłm, jāga haajē Cristo hiek gaaimua dau haug wauwai.

### Salud

**1** <sup>1</sup>Młłn Pedroou, Jesucristooucha hich hi jaaumk'ūr jłr hautarr. Päär pāach durr chaur parhooba haaidł durrum k'łłnag muata pārag mag hēsap p'ã deepłi chirłm: Ponto hanłm durrum k'łłnag, Galaciapienag, Capadociapienag, Asiapienag maimua Bitiniapienagjā hajjō; hajapcharan maach meeun t'um maach peerdłajem hiek hłk'a nłm gaaimua durr chaur dłr durrum k'łłnagma.

<sup>2</sup>Hermanonaan, hōor jua hōkgau pāar mag chik'am durr d̄ar durrab mam̄, pāarjā hagjō hich Hēwandamaucha j̄ar hautarr k'ʌʌn k'abahab, hichdēu warrgarwe k'īirju wai sīerrjō chadcha pāar peerd̄ hautarr haawai. Magtarr haawai pāarta hich Hak'arag hich hat'ee k'īet p'ē haupijim, Jesucristo meewai bag hārtarrau pāach hajaug paabapāiawai hich hipierraa wēnʌrramk'īir. Hēwandamau warag pāar h̄lu heeg hoonaa k'ōinaata pāar wai sēpim k'ōsi chiraajem.

### Jesucristo dāicha naaimajuuta k'īirjuajem

<sup>3</sup>Mua h̄lu hajim ha chir̄am maach Pōr Jesucristo Haai Hēwandamag, h̄lu hichdēuta maach dau haug k'augwi maach hak'aar dich pekau hee chi k'ēchamjō narrta h̄lu peerd̄ hauwi hich chaaink'a hautarr haawai. Mag hi chaaink'a n̄ʌm̄ʌn, h̄lu Jesucristojā deeu p'iid̄atarr gaaimuata mag hi chaaink'a naawai, <sup>4</sup>jāg n̄ʌʌ hawi hich Hēwandamau hich sim haar maach p'ē hauju jaau simjō hich d̄li chadcha wai joot'ʌjujā k'ap'ʌ n̄ʌm. Mam paauk'abaimam chan tag meejā meeba, k'aibagjā chuk'u, ni jōoiraa paajā k'augba hich magta n̄ʌisiju. <sup>5</sup>Pāraujā pāach t'ārauchata Hēwandam hiek h̄lk'a naawai hirua hich jua t'eegauta pāar t'ʌa wai sieju, mag hatag deeu Cristo bēewi maach hich haarcha p'ē harr n̄ʌm hora. Mag pāar p'ē hat'aadēm hedta pāachdēu nem hajap'am paarpaju k'īirjuajerrjā t'umaa chadcha pārau wai n̄ʌisiju.

<sup>6</sup>Maguata pāar pāachdēu h̄lk'a n̄ʌm hiek gaaimua gaai machgau hōk'īirjuu haju hawiajā maan k'ūchpaiu. Magwiajā chadcha Hēwandamau pāach d̄li mag hajap'a haju k'ap'ʌ naawaita magʌmjā higba chadcha pāar honee n̄ʌm. <sup>7</sup>Mam̄ mag pāar p'it'urg hau n̄ʌm̄ʌn, p'īr chaar k'ap haag hōtdau hee chach hoojemjō, pārau chadcha hich hiek t'āraucha h̄lk'a n̄ʌ ha k'ap haagau. Mag p'it'urg hau n̄ʌmjā hi hisegba h̄lu hāwat n̄ʌm̄ʌn, magan maata p'īr chaar k'āaijā h̄rcha balee sim, p'īr hawiajā mag hatag chuk'u haadēju haawai. Mam̄ mua jaau chir̄amjō mag hāwat n̄ʌm̄ʌn, magan deeu Cristo bēem hedjā hich Jōoirrauchata k'apanag dak'īir pāar t'ō hiek'aju, mag h̄lu hāwattarr jūrr.

<sup>8</sup>Pārau m̄ʌ dēnjō Jesucristo k'īircha hoobajieb mam̄, pārau hi k'ōsinaa hi hiekjā h̄lk'a n̄ʌm. Maguata hacha honeg n̄ʌm hiek'au pōd pārau pāach honegjā jaaju k'augba n̄ʌm, jāga naaimaju k'ai ya hich d̄līcha naaimaawai. <sup>9</sup>Mag pārau pāach daúa hi hooba naab mam̄, jāg hi hiek h̄lk'a n̄ʌm chan par k'abam. Jāg hich hiek h̄lk'a n̄ʌm gaaimuata h̄lu hirua pāar peerd̄ haubajieb.

<sup>10</sup>Warrgarwe Haai hi jaumienau jaajueejim, jāga Hēwandamau mag hōor peerd̄ hauju. Mam̄ mag hajap estudiewi d̄l̄rrcha hag hiek hig hiȳʌ haajerrjā hich maagwaiwe chan mag hamachdēu jaau n̄ʌmjā pōd hajappai k'augba haajueejim, jāga Hēwandamau magju. <sup>11</sup>Mam̄ hich Hēwandamau hich Hak'aragta hamag nem jaupiejerr haawai chadcha chi Hak'arauta mag Cristoou hōor peerd̄ hawaan bēēju nawejā hi higwi, “Woun hāb bēewi hōor hee hap'ʌʌ habarmuata nem t'um pōd̄p̄liwi hichta h̄gt'ar mawia t'umaam k'ʌʌn k'āai chi jua t'ierrk'a s̄isiju” ha jaajueejim hamag. Hamachdēu mag hūrbaawai warag hajapchata k'ap'ʌ

ham hiigjeejim, chijjäg wouchata mag bëeju ha jaau sī maimua mag pierrwaijã jãagwaichata barchëju ha k'ap Haag. <sup>12</sup>MamΛ mag nΛm hee hich Hëwandamau hamag k'ap'Λ hapiejeejim hīchab, mag hamau woun bëeju jaau nΛmjã hamach daúa hoobaju; hajapcharan maach hīs hewagam k'ΛΛn hat'ee bëejuuta mag jaaujeejim. Maagjerr haawai hīs maach peerdΛajem hiek jaau nΛm k'ΛΛnaujã, hich hag Hëwandam Hak'arauta maachig jaaupibaawai, hich mag woun bëeju jaaujerr hiekta maraujã jaau wënΛrrabahab. Hīsin mag hōor peerdΛ haaujem hiek maadëu k'ap'Λ nΛm hee, Hëwandam chognaan angelnaanaujã hagt'a k'augba naawai, hamau k'augam k'ōchaaga haajem, jãga mag Hëwandamau hōor peerdΛ haaujẽ.

### Hëwandamau k'ōsi simjōta wënΛrraju haai nΛm

<sup>13</sup>Maach Pör Jesucristo mag chi jua t'ierr haawaita muan pãrgan, hichdëu pãachig nem mag haawai hi hipierraa Haagta k'iir k'aug nΛisit ha chirΛm, hichdëu pãach jΛraan bëem hed Hëwandamau pãach dΛi hajap'a haju k'iirjugjã hogdΛba, ni Hëwandamau waupiba haajem nemjã wauju k'iirjuba. <sup>14</sup>Ya pãar Hëwandam hipierraa Haagta hi chaaink'a naawai hoob hΛdΛΛr warrgar pãachdëu hi k'augju nawe nem k'aigbam waujerragta deeu pãach gaai hΛr papimiet. <sup>15</sup>Magju k'āai maach Pör Jesucristo gaaimua maach peerdΛ hautarr Jōoijã pekau chuk'u sierraawai pãarjã pekau wauba pãach wënΛrrΛmpierr hãba hi hat'leepaita nem waubat. <sup>16</sup>K'iir heyaa habat, Hëwandamau hich hiek gaai,

“MΛjã pekau chuk'u chitaawai pãarjã mΛjō pekau chuk'u habat” ha sim.

(Lv. 11:44-45)

<sup>17</sup>K'ap'Λ habat hagjō, Hëwandamaun mΛig heegar hamachdëu nem waujerrjōta haju t'umaam k'ΛΛn dΛi. Mag simΛgta pãrau Haai hichë naawai mΛig heegarmua hΛgt'ar wëtju k'iirju durruwe hi dau na nem k'aigbam wauju hōk'ō habat. <sup>18</sup>Warran chadcha pãrau pãach jōoin hi maadëu higba simΛgta hΛrcha hee haajeejim, pãach dënnaanau pãachig jaau bāautarrjō. Pari maagjerr ya hīs Hëwandamauta hich hat'ee pãar peerdΛ hat'am. Pãrau k'ap'Λ nΛm, mag pãar peerdΛ hawaag, p'iiruijã p'agba ni p'atk'onaujã p'agbajim, jägΛm nem hãrb k'aba hãarjeewai. <sup>19</sup>JägΛm nemeu p'agju k'āai, hich jäg warrgar Hëwandamau hōrag corderodam chi hajapcharamta jΛrwia hichig ofrendak'a t'ōonaa deepiejerrjō, jürr hich Hiwaa Cristo bΛΛrjã pekau chuk'u k'itΛmta maach kōit t'ōopijim. Mag hi t'ōopitarran hi bag p'ir dΛi p'atk'on k'āaijã hajapcha sim hãrbarmuata maach k'aibag heemua hōbër hawaag hajim. <sup>20</sup>Mag Cristo hōor kōit t'ōopijujã hich Jōoirau mag jëb hompaaju nawe ya k'iirju wai siejim. Magtarr haawai pãar dau haug k'augwi hīs mΛg jaarta chadcha pãrag hich k'augpibarm. <sup>21</sup>Hich mag Cristo k'urauta hΛu pãrau Hëwandam hiek hΛk'a durrum. Mag Cristo t'ōowaijã, hich Hëwandamauta hΛu hi p'iriu hauwi, hich haar hauwi, hich dΛi jua t'eeg hãba hapijim. Maguata chadcha pãrau pãach

t'āraucha hi hiek hāk'a durrum, hich jāg Hēwandamau Cristojā p'iriu hauwi hich haar hautarrjō pāachjā hagjō hich haar hauju k'ap'Λ naawai.

<sup>22</sup>Mag nΛm dāi hīs maach peerdΛajem hiek chaar Cristoou jaau sim pāachdēu hāk'a nΛm gaaimua, ya pāar hirua hajaug paabapΛim, pāach wir haigjā hagdaujō dich k'apeen dāi daupii wēnΛrramk'īir. Ya mag hi jua hajaug paapΛitarr k'ΛΛn haawai par hiiupai k'aba t'ārauchata pāach k'apeen daupii habat, dich k'apeen hēugar parhooba k'īirjuba. <sup>23</sup>Magaag ya pāar warr pāach naajerrjō k'aba nΛm, mag Cristo hiek hāk'awi hajaug paapΛitarr gaaimua heeu t'aaba nΛmjō pekau chuk'u hi chaaink'a naawai. MamΛ mag pāar deeu t'aabatarr chan pāach hād bi heemua k'aba, hich Hēwandamau hich hiek hāk'api hat'amuata mag heeu t'aababarmjō hapijim. Hajapcharan hi hiek'auta maach hġt'ar hōbērpiejem. Mag hiek chan bġΛrjā chugpaa k'augba hich magta sierrΛm. <sup>24</sup>Maguata hich hiek p'ā sim gaaijā hich hiek hich mag chugpaa k'augba sierrΛm higwi magjim:

“Sīi hich mag hēumee wēnΛrraag k'aba haawai mΛig heegar in hōran sīi pabġ k'ēr k'uk'uur t'Λnaawi k'Λibaadeejemjōta nΛm.

Par hamau wir haig hamach t'ōo haawaijā sīi mag pabġ k'ūchpai maar bau t'Λnaawi deeu k'iugp'ē k'Λibaadēmjōta haajem, ya meebaadeewai.

<sup>25</sup>Magarrau mΛ hiek'an chadpama, bġΛrjā chugpaa k'augba hich magta sierrΛm” hajim maach Pōr Hēwandamau.

(Is. 40:6-8)

Mag hiekta maach peerdΛajem hiek'au. Hich mag hiekta pāragjā jaabujieb.

**2** <sup>1</sup>Mag hich hiek hāk'api hat'amuata Hēwandamau maach deeu t'aabapibarmjō hapiejeewai muan pāragan, pāachdēu nem k'aigba k'īirjuajerr t'um warre hisegbapΛit ha chirΛm. Hoob chik'am k'ūgurmiet; hoob chad k'abamta chadam hiekjō hiek'amiet; hoob chik'amnau nem wai sīsīdΛmjā pāach dēn hapim k'ōsi hamiet, ni chik'am hēugarjā hoob k'aigba nem hīgk'amiet. <sup>2-3</sup>Magju k'āai ya mag pāar heeu t'aababarmjō naawai, hich jāg chaai heeu hau k'itΛmua jūd doog bīe k'itaajemjō, Hēwandam hiek warag k'augam k'ōchgauta dō dōm k'ōsimjō habat, mag k'augmampierr pāach t'āar hajapcha paauk'amamk'īir. Pārau chadcha maach Pōr Hēwandam pāach dāi hajap'a k'itΛm k'ap'Λ naawai pāach hich haar p'ē hau nΛm hora hi hiekta k'augam k'ōsi habat, mag k'aug nΛmua warag hag hiek gaaita hubΛ naag.

### Cristo chi dihād jārram, hōor hiiupiejem

<sup>4</sup>Mag hi hiek gaaita hubΛ naagan, Cristoouta hichjō maach hich mag hiiupiejeewai, hi bġΛta hēk'abat. ¿Pārau k'augba nΛ, Hēwandamau mag Cristo hiek hāk'apimampierr hich hat'ee di hēumamjōta sim? Mag di hēumamjō sim haig, Cristota mag chi dihād jārramk'a sim; maagwai maach jūrr chi

dipá chi daígek'a nΛm. Hōrau hi hisegjierrab mamΛ, Hēwandamagan hichta dipá chi hajapcharam haawai hichta jΛr hauwi chi dihād chaark'apijim. Hāba hi gaaimuata hāu maach Hēwandam hōork'a nΛm. <sup>5</sup>Mag pārau Cristo hiek hāk'a nΛmuata Hēwandamau hich hat'ee di hēu harrumjō sim. Di chaar hēu nΛm k'abamta pari pāachta chi dipá daígek'a nΛm, hajapcharan hi hōorma. Mag hi hōork'a naawai hāba hirigpaita jēeunaa hirigpaita hee haju haai nΛm, hichig magamk'iirta maach hich hōork'a wai siawai. Pari mag hi hat'ee nem hajap'a wau wēnΛrram chan pāachta hajap'a nΛm gaaimua k'aba Jesucristo hajaug t'ō nΛm gaaimuata mag wēnΛrraawai, Hēwandamaujā hich dawagaata hoojem. <sup>6</sup>Mag dibig higwiata Hēwandamau hich hiek p'āpitarr gaai,

“Pāadē hūrbat: Mua mΛch p'ōbör hat'ee woun hāb pāi chirΛm” hajim,  
 “dibigjō chi hajapcharam mΛchdēu jΛr hautarr hichta chi dihād  
 jārram k'amk'iir.

Hi gaaimua k'abam chan pōd hiwiir hābjā mΛ hōork'abajū.

Magua hi hiek hāk'a sim woun chan naspawia parta hi hiek hāk'ajim habaju, mag mua pāi chirΛm wounau hi k'ūrgurbaju haawai” hajim.

(Is. 28:16)

<sup>7</sup>Pāar chi hāk'a nΛm k'ΛΛnagan Cristoon chadcha dibig hajap'amΛu.

MamΛ har hāk'aba nΛm k'ΛΛnagan maadēu nem higmap'amjōta sim.

MamΛ mag hi hisegju higwi Hēwandam hiek gaai jaau simjō,

“Di hēu narr k'ΛΛnau dipá hisegtarra jūrr chi dihād jārramk'a sīsiju”  
 ha sim.

(Sal. 118:22)

<sup>8</sup>Maimua hīchab hich hag woun higwiapai,

“Jāg dibig gaaimuan hōor bāhēu sub k'aba bāhēu suwi burrju” ha sim.

(Is. 8:14)

MamΛ mag ham bāhēu suwi burrju ha simΛn, maach peerdΛajem hiek jaau nΛm hūr nΛmjā hamachdēu hāk'aba harr gaaimua Hēwandamau hich haar haubajuuta jaau sim, hich warrgarwe mag hich hiek hāk'abam k'ΛΛn dΛin hich magta haju harr haawai.

<sup>9</sup>Pari pāar chan Hēwandamau mag hisegbam. Pāran hich Hēwandamauchata hich chaain k'amk'iir hich garmua jΛr hautarr k'ΛΛnau. Pāarta p'adnaanau haajemjō hōor kōit jēeujem k'ΛΛn k'abahab, maach Rey Cristoou sīi hich hat'eepai nem waumk'iir jΛr hautarr k'ΛΛn. Pāarta warr k'īchag heemjō naajerr k'ΛΛn Hēwandamau hich hiek hāk'api hat'amua hararagag hōbeer hautarr k'ΛΛn k'abahab, mag pāach hararag hee hōbeer hautarr Hēwandam chadcha hōor dΛi hajap'a k'itΛmta jūrr deum k'ΛΛnagjā jaauk'iir hich hōork'a hautarr k'ΛΛn. <sup>10</sup>Warran chadcha pāran sīi parhoobam k'ΛΛnk'a t'Λnaajim. Pari mag t'Λnarr hīsin ya pāran Hēwandam hōrau. Mag hagt'a hi hōor k'aba t'Λnaawai chan pārau bΛΛrjā hirua pāach dau haug k'aaugjem k'augba naajim; mamΛ hīsin chadcha pārau k'ap'Λ nΛm, Jōoirau pāach dau haug k'aaugjem.

### Hēwandamaun hich hipierraa hamk'īirta maach hompaajim

<sup>11</sup>Keena, Cristo gaaimua k'odamnaan, mΛ hiek hūrbat: Maachin Hēwandam dāita durrk'aimaju k'ΛΛn haawai, maig maig jēb gaai wēnΛrrΛm haiguin sīi dijā chuk'u k'ūchpaim hat'ee chik'am durr gaaita wēnΛrrΛmjō nΛm. Mag hi dāi naaimaju k'ΛΛn haawai hoob sīi pāach hō k'ōchagpierr nem waum k'ōchgau Hēwandamau k'ōchk'abam nemta waumiet. JāgΛm nem wauju k'īirjugan maach burrpieg maach dāi wērba nΛmjōta nΛm. <sup>12</sup>Hēwandam hiek hΛk'abam k'ΛΛn daarjā nem hajap'ata waaujeet. Maagwai hamau pāar hēugar hōor k'aigbam k'ΛΛn hēugarmjō hiek'awiajā, Hēwandam bēem hedjā chadcha pārau nem hajap'a waaujerr k'īirjunaā jūrr hamau, “Jāgan chadcha hamau nem hajap'ata waaujeejiebma” haju.

<sup>13</sup>Pārau Cristo k'ōsināa hi hipierraa haajeewai maig heegarjā t'um chi t'et'emnaan t'ΛnΛm k'ΛΛn hipierraa habat: Rey t'umaam k'ΛΛn pōr haawai hi hipierraa habat. <sup>14</sup>Refu gobernadornaan k'apitar k'ΛΛnau nem mag haawaijā ham hipierraa habat. Mak'ΛΛnauta hōrau nem k'aigba haawai pΛrnaa castigaamk'īir wa hōor nem hajap'a wau nΛm k'ΛΛn higwia hajap'a hiek'amk'īirta Hēwandamau mag chi t'et'emnaank'a wai siebahab, hichdēu k'ōsimjō. <sup>15</sup>Hēwandamaun pārau nem waauwaijā nem hajap'ata waupim k'ōsi sim, mag nem wajap'a wau nΛm gaaimua hi hiek k'augbagau sīi k'īirjug chuk pāach hēugar parhooba hiek'am hiigjem k'ΛΛn warag k'īupaa siwaag.

<sup>16</sup>Pāran Hēwandam hipierraa haagta naawai hirua k'ōsim nemen pāachdēu waum haig wauju haai nΛm; mama mag pāachdēu nem waum haig wauju haai nΛm hawi, hoob sīi Hēwandam k'augbam k'ΛΛn dēnjō nem k'aigbam wawaagta mag pāachdēu nem waum haig wauju haai nΛm hamiet. <sup>17</sup>Hagdaujō dich k'apeen t'umaam k'ΛΛn respetaabat. Cristo gaaimua pāach k'odnaank'a t'ΛnΛm k'ΛΛnjā daupii habat. Hēwandamta t'umaam k'ΛΛn k'āaijā hōk'ō habat, maimua maig heegar hichdēu hōor chi pōrk'api nΛm k'ΛΛnjā hichab respetaabat.

### Jāga haju haai nΛ Cristo gaaimua dau haug waauwai

<sup>18</sup>Har sīi chik'am chogk'a nΛm k'ΛΛn, pāach patronnaan hōk'ōnaa hamau nem jaau nΛmta hipierraa habat. Mama mag nΛm chan sīi pāach dāi hajap'anaa hagpierraa haajem k'ΛΛn dāipai k'aba, pāach dāi hat'uucha haajem k'ΛΛn dāijā hich hagiō ham hipierraa habat. <sup>19</sup>Hēwandamau k'ōsi simjō pāachdēu mag ham hipierraa nem wau nΛmta pāach dāi hat'uucha nem k'aibag haadēp'Λmjā k'īu jΛm nΛmΛn hΛu sim; magan maach Haai Hēwandamauta pāar t'ō hiek'aju. <sup>20</sup>Mama nem k'aigba wau nΛm gaaimuata pāach gaai mag hat'uucha wau nΛmjā sīi k'īu jΛm nΛm paar chan, hoob Hēwandamau pāach t'ō hiek'aju hamiet. Magarrau nem hajap'a wau nΛm paarta warag pāach dau haug wau nΛmjā k'īu jΛm durrumΛn chadau, chadcha Hēwandamau pāar t'ō hiek'ab k'aba t'ō hiek'aju. <sup>21</sup>Hich Cristouucha jaauwaijā, hichdēucha hich hat'ee jΛr haumam k'ΛΛnan hichiita chik'amnau dau haug waub k'aba dau haug wauju haajem, hich jāg hichjā maach

kōit dau hap'ΛΛ harrjō. Wajapcharan mag chik'amnau dau haug wauuwai jāga haju haai nΛ ha k'ap hamk'iirta maachjō wounag pawī hichta nacha hap'ΛΛ hajim. <sup>22</sup>Cristo chan bΛΛrjā pekau wauba ni chik'amnag sēuk'ajā nem jaauba k'itajim, mamΛ mag k'itarra chadcha hamau hi t'ōojerram. <sup>23</sup>MamΛ mag hi t'ōogpamua jūrram k'ΛΛnau hich k'iir hiek'a t'Λnaawajā, hi hiekk'ōr chuk'u chiramta hi dāi mag nΛm hawi hamach dēnjōjā hiek'aba, ni ham dak'āujā dak'āuba, sī warag Hēwandam t'umaam k'ΛΛn dāi nem hagcha waujemΛgta jēu k'itajim, hich dāi mag nΛm k'ΛΛn dāi hichdēuta k'ap hamk'iir. <sup>24</sup>Maachta maach pekau gaaimua Hēwandamau k'ēchpāiju haai naajim; mamΛ mag narra Cristoouta jūrr maach kōit hΛdΛraa pakuls gaai hich meerp'ē t'ōopijim, magbarmua maach hich hat'ee peerdΛ hauwi ya tag pekau wauujā k'augba sī hich dāipaita nem hagcharam happai wau wēnΛrramk'iir. Magta Cristo dau hap'ΛΛ hōor jua machgau bag k'a hΛlīpa k'itajim, maach pekau hee narra hΛu peerdΛ hawaag. <sup>25</sup>Warr Cristo k'augba haajeewain sī oveja chaaindam pap chuk'u hok'oo wēnΛrramjōta naajim; mamΛ hīs ya hi k'augwi hi dāita naawai, pastorrau hich nemchaain hoopaar t'Λa wai nΛrrajemjō, hichdēuta maach t'Λanaa hoopaar wai sim.

### Jāga hapim k'ōsi sī Hēwandamau dich hōor dāi

**3** <sup>1-2</sup>HΛΛin, pāarjā haggjō hīchab chi jaainpan, pāach jaainagta hΛdΛraa pāach p'ēt'Λgpibat; pāach jaainau Hēwandam hiek hΛk'aba haajem k'ai, pāachdēu Hēwandam hōk'ōnaa hi hipierraa ham k'ōchgauta hΛdΛraa pāach p'ēt'Λgpibat, hamach dāijā mag hajap'a nΛm hoowia hamachig Hēwandam hiek jaaujā jaauba sī pāach hoowiapai k'āijā pāach dēnjō hΛk'amk'iir. <sup>3</sup>Chihōowajā hoob sī hat'uu chihōomiet, nem hatcharag hōor dauderraa pōr megba, chihōo p'ir dēn wa k'ajūa parhēpagk'am k'āijā jūabaawai magΛm gaaimua pāachig heerpapa ham hugua. <sup>4</sup>MamΛ mag chihōo nΛmuata pāach hooimΛ hoopiju k'āai, pāach t'āarta Hēwandam dau na wajap'a hapiju hēk'abat. Hajapcharan pāach jaain dāi k'iir machaggjā chuk'u, ham hiek dāi hΛk'ap'pāijā haba wēnΛrramuata pāach hajaug hoopibat. MagΛm nemen chadau sī chihōo mor gaai jūajemjō t'Λrrdawi hok'oojem nem k'aba haawai hich Hēwandamaujā dawagaata pāar gaai hooju. <sup>5</sup>Hich magta warrgarm hΛΛin Hēwandam hiek hΛk'anaa hi hat'eepei nem waujerr k'ΛΛnjā mag hamach jaain hipierranaa hamach p'ēt'Λgpi nΛmuata hajap chihōo nΛmjō hamach hathaba hoopiejeem. <sup>6</sup>K'iir heyaa habat, jāga Saraaujā hich jaai Abrán hipierranaa warag hirig hi pōr haajeeljī. Pāraujā pāach jaain dāi Hēwandamau k'ōsimjō hajap'ata nem wau nΛmΛn, magan hΛu pāraujā Saraau hΛk'aaajerrjō Hēwandam hiek hΛk'a nΛm. <sup>7</sup>MamΛ pāach chi hemk'ooin chi hΛΛinpanaujā haggjō pāach hΛΛin hajap'ata haairaa habat, hich Hēwandamau ham dāi magta hapim k'ōsi simjō. MamΛ mag nΛm chan mag hΛΛin haawai pāach k'āai juapā heegpai k'it'ēe haawaipai k'aba, hamjā pāachjō hīchab hich Hēwandamau hich haar p'ē hauju jaau siewaita ham chig haba warag jāsene habat. Heeu magba hak'iin, mag k'aigba haadēp'Λm gaaimua hāba hohoodōnaa Hēwandamag jēuum k'ōsi jēeuba haduk'am.



Jāga haju haai nΛ nem hagcha wau nΛm gaaimua dau haug wauwai

<sup>8</sup>Maimua hābmiecha deelum k'ΛΛn dΛijā jāga haju haai nΛ ha k'ap hamk'iir pārag jaauk'im: Cristo hiek hΛk'a nΛm gaaimua t'um pāach k'odk'a t'ΛnΛm k'ΛΛn dΛi hō hāba habat, Hēwandamau k'ōsimjō Haag. Pāach hee hāb k'āijā gaai masi wa hōk'iirjuu k'āijā haawai pāachta mag nΛmjō dΛi gaai masi habat, hagdaujō dich k'apeen k'a k'ōsi chadcha k'odk'a nΛm k'ΛΛnjō. Hagdaujō chik'am dau haug k'aug paraata habat, dichta warm k'ΛΛn k'āijā hΛrpai nΛm ha k'iirjuba. <sup>9</sup>Chik'amnau pāach dΛi k'aigba haawai hagjō haju hawi hoob ham k'aibag waumiet. Pāach hāauk'a t'ōp hiek'a t'ΛnΛΛuwaijā hoob ham hēugarjā hamach dēnjō hamiet. Magju k'āai mag pāach dΛi k'aigba haajem k'ΛΛn kōitjā warag Hēwandamag ham heeg hoopita jēubat, magamk'iirta warrjā pāar hich dēnk'a hautarr haawai. Magbaawai pāachpata Hēwandamau hajap'a wai sēju. <sup>10</sup>Mag dich dΛi k'aigba haajem k'ΛΛn dΛi hajap'a haju haai nΛm ha k'ap hamk'iir, Hēwandamau hichig p'āpibaawai jōoi Daviiu,

“Hich magta honee nΛrram k'ōsi sim k'ai, pΛch meuk'iir t'Λwauu hat'á” ha p'ājim, “nem k'aigba wa sēuk'a k'āijā hiek'amaaugau.

<sup>11</sup>Chik'am dΛi k'aigba haju k'āai, hōor dΛi nem hajap'a waujuuta jΛnaa k'ōinaa hajuuta hēk'abá.

<sup>12</sup>Maach Pōr Hēwandam dau na nem hagcha waujem k'ΛΛnan hichdēuta t'Λanaa,

hamau hichig jēuwaijā hΛu ham hiek hūurjem” ha p'ājim.

“MamΛ hich dau na nem k'aibag waujem k'ΛΛn dΛin k'iir masita sierram” ha p'ājim.

(Sal. 34:12-16)

<sup>13</sup>Hēwandam mag sierraawai hichdēu magpibam haig chan hi dau jam hōrau pāar chig habarju, nem hajap'a wau nΛm paar. <sup>14</sup>Hichiita mag nem hajap'a wau durrum paar hamau pāach dau haug wauwajā honee habat; pāar mag hap'ΛΛ habarm paarjā Hēwandamau sī par hok'oopiba nem hajap'am deeb k'aba deēju. Magua hamau warag pāach dak'āuwaijā hoob ham hōgk'amiet, ni hatcha hōk'iirjuujā hamiet. <sup>15</sup>Magju k'āai warag pāach hōdegpai, “Maach Pōr Cristoouta k'ap chirΛm” hawi, hāba hirigpaita jēubat. Hābmua k'āijā pāachig, “¿K'an jāgwiata jāgcha pārau Cristo hiekta hΛrcha hΛk'anaa hi dΛi k'iircha hoojuuta k'iirjuajerrāma?” ha jēuwai, hamag jawaagjā hag nawe pāach hiek'aju k'iirju wai nΛisit, dēgōlp hābmua jēuchēwajā hagcha jawaag. MamΛ mag jaauwajā sī hit'ūu hamag jaubat, chadcha Hēwandam hōk'ō haajem k'ΛΛnjō. <sup>16</sup>Pāach hiek'ajemjōta hōor dak'iir nem wauwajā hajap'a nem waubat, pāach k'iir parhooba hiek'ajem k'ΛΛnaujā pāach mag Cristo hiek hΛk'a nΛm gaaimua hajap'a wēnΛrram hoowi deeu hamach hiek'atarrpai k'iirjunaa hamachta chigaa hamk'iir.

<sup>17</sup>Hich Hēwandamaujā magta hapi sim k'ai, nem hajap'a nem wau nΛm gaaimua dau hap'ΛΛ nΛmta nem k'aigbam wau nΛm gaaimua dau haug



wau nAM k'āaijā hajapcha hōbēr sim, magAM t'um h̄lu pōdpr̄itarr paarjā Hēwandamau s̄ii par hok'oopibaju haawai. <sup>18</sup>Pārau k'ap'Λ nAM, Cristojā maach k'āai hajap'a k'itarrra, j̄urr maach Hēwandam d̄ai hiekk'ōr pōm narr k'ΛΛn kōit hΛΔraa hich dau hap'ΛΛ hapijim. Pari mag hi meetarran, warr hōrau hamach pekau hat'ee h̄l̄iba nemchaain t'ōojerr k't̄ir k'aba harr haawai, mag biek hābpai meebarmua maach chi k'aibagnaan Hēwandamau h̄lu maach hauju hayaa hamk't̄ir hajim. Hí woun harr haawai chi meen chadcha meejim; mamΛ hí h̄ichab hich Haai gaaimua Hēwandam harr haawai mag meetarrjā hich mag h̄iu s̄isijim. <sup>19</sup>Mag Haai gaaimua Hēwandam harr haawaita, h̄ichab mag hich t'ōobaawajjā, meetarr k'ΛΛn Hēwandamau preso p'è wai sierr haar ya hichd̄eu nem t'um pōdbap'Λim jawaan majim. <sup>20</sup>Mag preso t'Λnarr k'ΛΛn warr jōingarwe Hēwandam hichaur harr k'ΛΛn hajim, Noé barco wau sim jaar Hēwandamau hōrag hich hiek h̄lk'amk't̄ir Noeeg jaaupibaawai parii jōoirau jaa jōchk'ēΓΛΛ haajerrjā h̄lk'aba harr k'ΛΛn. Hich mag jaar mΛg durr t'um dōhādau hierrpawi hōor pōm wējorr hee ochopaita peerdΛjierram haajem, chi Noé hich chaain d̄lipai. <sup>21</sup>Hich jāg Noé hich chaain d̄ai mag dōhād heemua peerdΛtarrjō, maachjā hagjō dō hee pōr choo nAMuata maach peerdΛ nAMjā hōrag k'ap'Λ hapiejem, Jesucristo h̄iu p'iidarr gaaimua peerdΛ naawai. Pari mag dōou pōr choo nAM chan maach mor chi h̄l̄ramta hap'lyaag k'aba, Hēwandamag dich t'āarta hajaug paapi jēeunaa hichd̄eu k'ōsimjō wēnΛrraagta mag pōr choojem. <sup>22</sup>Mag h̄iu p'iidΛtarr Cristota h̄lgt'ar mawi, t'umaam k'ΛΛn k'āaijā hichta Hēwandamau hich d̄l̄icha hich juachaar gar juppiwi, h̄lgt'arm magwe hich chognaan t'um chi t'et'echaram k'ΛΛnagpa h̄iita hōgk'awi hi hipierraa hapijim.

#### Cristou dichig juapá deemarrpierr hagua nem hajap'a haju haai nAM

**4** <sup>1</sup>Mag, Cristojā maach gaaimua hōrau mas wautarr haawai pāarjā hagjō hi gaaimua dau hap'ΛΛ haag magAM habaju haai nAM. Cristo gaaimua dau haug wau nAMjā magAM haba, waragta hi hipierraa jAMP'p'lik'amΛn, pekaujā maach d̄ai jua t'eeg chuk'uta haadeejem, <sup>2</sup>magbaadēm haigmua chan ya tag dichd̄eu nem k'ōchagpierrta nem wauba, hāba Hēwandamau k'ōsimjōta nem wawaag. <sup>3</sup>Chadcha warrgarin Hēwandam hiek h̄lk'abam k'ΛΛnau nem waaujemjō pāraujā pāachd̄eu ham haig haajeejim. Maguata pārau ham d̄enjō parhooba dich hōor k'abam d̄aijā k'apes ham k'ōsinaa tagam nem k'aigbamjā waum k'ōchk'aajeejim; nagjā doojeejim; p'iesta pōmjā waunaa, dōnaa s̄ii k'ēch t'ΛnΛisip haajeejim. MamΛ magpaijā k'aba, chadcha Hēwandamau magpiba simta pārau nem parhoobam waunaa hēwandam hawi magAMagpata jēuejeejim. <sup>4</sup>Maagjerrta h̄is ya pārau Cristo hiek h̄lk'a nAM gaaimua mag tag hamach d̄ai parhooba nem wauba s̄ii warag hamachig hoobamjōo hap'ōbaadēm hoowi, pāar d̄enjō h̄lk'aba nAM k'ΛΛnau pāar hēugar parhooba hiek'aajem. <sup>5</sup>Hamau pāar hēugar mag naab mamΛ, hichiita jāg nΛΛ hawi Hēwandamau j̄urr hamag magAM hiek hēudΛb k'aba hēudΛju. Mag hedan nachgarwe hōtarr k'ΛΛn hawiajā deeu hichd̄eu t'umaa

p'iriutk'a hauwi hagt'a hiiu durrum k'ΛΛn dāi hāba hamagiā hamach k'iircha jaaju, jāga haju ham dāi hamach k'aigba wēnΛrrarr paar. <sup>6</sup>Magju haawaita mag meewi jēb hee durrum k'ΛΛnagiā, hagt'a ham dau p'uu nΛwe, hich hiek jaupijim, hāk'amk'iir. Mag hāk'atarr hak'iinjā, hēumee deeba harr haawai, hichiita maach chi hΛrΛmΛn hich jāg meek'am. MamΛ mag hamachig jaubaawai hāk'atarr hamuan, hich Hēwandamjō ham hak'aarjā hich mag hich dāita nΛisimk'iir hajim.

<sup>7</sup>Ya Hēwandamau mΛg durr hi hagk'aimΛΛ pam. Mag maach hōju gayaa pamaawai sīi donnaanjō nem parhoob wauba, hāba Hēwandamagta jēeu nΛΛ habat. <sup>8</sup>Pari hΛrcha dich k'apeenta daupii habat. Mag chadcha ham daupii wai nΛm chan, maach dāi biek k'apan k'aigba hawiajā, ham dāi magΛm hiek higba sīi warag ham perdonaju. <sup>9</sup>Pāach haig hōordam bēewaijā, bΛrjā hiek chigaa hiek'aba, pāach haig jēerpim k'ōsi jēerpinaa nem k'oojem nemdamjā hō hāk'ārag chuk'u deebat. <sup>10</sup>Cristoou hichdēu k'ōsimjō nem wajak'p'a waumk'iir pāachig hich juapā deemarrierr hich hagua hagiō pāach k'apeen dāi pāachdēu k'ap'Λgpierr habat, magamk'iirta pārag hich jua t'eeg deetarr haawai. <sup>11</sup>Hāb k'āijā Hēwandamau hich hi jaaujemk'api sim k'ai, hich Hēwandam jua t'eeg dichig deetarrauta magΛm p'idagiā waubā. Nem t'um Hēwandam hat'ee wauuwaijā, maach Jesucristo dēnk'a nΛmua mag wau nΛm hoowia bigaaum k'ΛΛnagpa Hēwandam t'ō hiek'amk'iirta nem wauju haai nΛm. Pāar Jesucristo dēnk'a naawaita magmΛn hΛucha sim. Hich Jesucristota mΛg hatag pawiajā hich mag jua t'eeg sierraju haawai hirigta maach t'umaam k'ΛΛnau hee haju haai nΛm.

### **Cristo hiek hāk'a nΛm gaaimua dau haug wau nΛm**

<sup>12</sup>Keena, Cristo gaaimua k'odamnaa, pāran chadcha dau haug wau nΛmuata t'ūr hajap'a hōbēru k'ap Haag hōtdau hee p'aa hoo nΛmjō haajem. MamΛ Hēwandamau hΛdΛraa mag pāach dau haug waupiewai, hoob “¿K'an jāgwiata pua hΛdΛraa mΛg maar dau haug waupi chir'?” hamiet. Pāar jājāgk'am chan pāach happai k'abam. <sup>13</sup>Magju k'āai mag pāach dau haug wauuwai warag honee habat, Cristojā maach gaaimua hap'ΛΛ harr k'ap'Λ nΛm gaaimuata mag naawai. Pārau magta hamΛn, mΛg durr gaai hich Cristocha t'umaam k'ΛΛn Pōrk'anaa hōor dāi hichdēu k'ap Haag bēem hedjā warag hatchata pāar honee haju hich dāicha. <sup>14</sup>Mag dau haug wauuwaijā, hich Hēwandam Hak'arauta warag hich Hēwandam t'ō hiek'apiegjā juapā deejewai, hābmua k'āijā pāachdēu Cristo hiek hāk'a nΛm gaaimua pāach k'iir hiek'a t'ΛnΛΛuwaijā warag honee habat. Hēwandam Hak'ar chan paar dāi hogdΛba hich mag sīejem. <sup>15</sup>Mag chadcha chik'amnau pāar jaaju hawiajā, hōor t'ōotarr gaaimua k'aba, nem jīgk'a nΛm gaaimua wa parhooba nem k'aigbam wau nΛrrΛm gaaimuajā k'aba, ni dich dāi k'abamta dich gaai paa hauwia hiekk'ōr paarpatarr gaaimuajā k'abata mag pāach jaupibat. <sup>16</sup>Cristo hiek hāk'a nΛm gaaimuata chik'amnau pāach jaau nΛm k'ai, hoob k'iir naaumiet. K'iir naaju k'āai, warag Hēwandamagta hΛu nΛm habat, hi chaaink'a nΛm gaaimuata hōrau pāach dāi mag naawai.

<sup>17</sup>K'ap'Λ habat, maach mΛg nΛm haig maachta nacha Hēwandamau dau haug waupi sim, hich chaain hāba. MamΛ mag maach dau haug waupi simΛn, magΛm gaaimua warag hich dāita hajaug paauk'amamk'īrau.

Hēwandamau maach hich chaain dāijā magta sim k'ai, čjāgaju k'ai har maach peerdΛ haaujem hiek bΛΛrjā hΛk'aba mee nΛm k'ΛΛn gaai?

<sup>18</sup>Hēwandamau hōor dāi magju higwi, hābmua hi hiek p'ā sim gaai,

“Mag chi hajap'a hΛk'a sim wounjā hajap p'it'urg hauwiata hΛu peerdΛ sim k'ai,

magan čjāga peerdΛagāwa” hajim, “har bΛΛrjā maach Pōr Hēwandam hipierraa k'aba nΛm gaaimua hamach pekau hee mee nΛm k'ΛΛn?”

(Pr. 11:31)

<sup>19</sup>Magua pāadē k'īirjubat: Hichiita Hēwandamau hich gaaimua mΛig heegar pārag magta dau haug wau wēnΛrrapi sim k'ai, warag nem hajap'amta hi hat'ee waunaat, pāach dāi chik'amnau mag nΛmjā higba. Pari magaagjā, hich maach hompaatarr Jōoiragta pāach t'Λapibat. Pāar hak'aarta jāg Jōoi jua hee pam chan chig habam.

#### Pedroou chi hΛk'a durrum k'ΛΛn wawitarr

**5** <sup>1</sup>Hābmiecha paawai pāar iglesia hee jōoin chi pōrnaank'a nΛm k'ΛΛnagjā wawí hiek'am k'ōsi chirΛm. Ya mΛchjā hīchab jōoinau hamjō. Mua mΛch daúa pakuls gaai Cristo dau hap'ΛΛ jōchk'ērΛm hoojim; mag Cristo deeu hich jua t'eeg t'um bēem hedjā mΛchjā hamjō hīchab hi dāi chiraju. Mag ham wawim hig chirΛmΛn mΛgau:

<sup>2</sup>Hich jāg pastorrou hajap'a hich oveja t'Λajemjō, pāach hee Hēwandam hiek hΛk'a nΛm gaaimua hi dēnk'a durrum k'ΛΛndam pāachig jaautarrta hajap'a hoopaar habat. Mag ham t'Λa nΛmjā hajués bigaaum k'ΛΛnau jaauwai k'aba, hich Hēwandamau jaau simjō pāach k'īrauta hi chaain t'Λam k'ōsi t'Λabat. Mag p'idk'a nΛm gaaimua p'atk'on pōm paarpajujā k'īirjuba, sīi pāach t'ārau waum k'ōsi haawaita waubat. <sup>3</sup>Pāachta chi pōrnaan hawi sīi hamagpaita nem jajaau haba, pāachdēuta nacha haudΛdΛ habat, hamachig nem jaauwaijā dāi k'ōsi waumk'īir. <sup>4</sup>Magta pārau ham t'Λa nΛmΛn, maach t'Λajem chaar Cristo dēgōlp t'umaam k'ΛΛn Pōrk'a dΛnΛΛubaicheewaijā pāarta hirua hich haig t'Λrnaa hich garcha p'ē wai sīsiju. Magbarm chan sīi pamaarjō k'ūchpai hooimΛ t'Λnaawi p'uaajem nem k'aba haawai hich magta hi dāi nΛisim hiek'au.

<sup>5</sup>Hich hagjō hēwannaanagjā mua mag chirΛm: Hēwandam hiek hΛk'a durrum k'ΛΛn hee pāach k'āai jōoinau pāachig hiek'aawai, sīi ham hipeer hahau haju k'āai, hΛdΛraa pāach wawipinaa warag ham hipierraa habat. T'umaa hagdaujō jūrr dich k'apeen chogk'a nΛmjōta habat. Magbaju hat'een Hēwandamau hich hiek gaai jaau simjō:

“Har mΛjā higba hamach juapaaupaita wēnΛrraajem haajem k'ΛΛn chan mΛchdēujā higba chitΛm” ha sim.

“Magarrau hamach serbiibag k'ap mλchdëu nem jaau chiram wawaagjã mλch juapadam hiigjem k'λλnan chadau, mλch garmuajã ham dau hee haug k'aaugjem” ha p'ãpijim.

(Pr. 3:34)

<sup>6</sup>Maguata pãach serbiiba nλm k'ap, pãach dau hap'λλ haawaijã, magλm higba, Hëwandam chi jua t'ierrigta warag, “Hëwandam, pλchdëuta k'ap chiram” habat. Pãrau magta hamλn, mλg hatagta hichdëu k'ap hirua pãach dau hap'λλ hapiejerr k'λλn k'ãaijã jürr pãachta hλrpai hapiju.

<sup>7</sup>Pãachdëu nem k'iirju nλm t'um hidëu Hëwandamagta deebat. Hirua pãar k'ösi haajeewai jãg pãar p'it'ur nλmjã sii hoobamjöö habaju.

<sup>8</sup>K'iir k'ap'λ habat: Meperan k'umau nem pλr haum hig sim haig sii jierrbagt'λ haadëp'λmjöta sim maach bigaau, maach pekau hee burrpiju hëk'aawai. <sup>9</sup>Magua pãachdëu hλk'a nλm hiek gaaita warag hubanaa hλdλλr pãach t'λ haum hugua, dλi t'et'e t'ierrk'abat. Pãar dλi jãjãgk'am chan pãar dλipai k'aba, pãar dënjö hλk'a durrum k'λλnjã durrpierr hich jãg p'it'urg hau nλmta magbamjöö nλm. <sup>10</sup>K'üchpai pãar mag dau haug wau dichdimaawai hich Hëwandamauta pãar hajapcha hajaug paapliwi warag hubλ hapiju, hajap juapã jãp nλisimjö nλisiewai hich hat'ee nem waum k'ösi waumk'iir. His pãar mag dau haug wau naab mama, hich Hëwandam maach daupii haajemuata maach peerdλ hawaag hich garmua maach jar hautarr haawai Jesucristo dλi hãba hich hajaug hich mag hoo wënλrrapiju. <sup>11</sup>Magua hirigta hee haju haai nλm, hichdëuta mλg hatag pawiajã nem t'λnλmλn t'um hich mag k'ap sierraju haawai.

### Hãbmiecharam salud

<sup>12</sup>Keena, chadcha mλchdëu hoowai nem wawaag magλm haba k'itaawai maach hermano Silvanoogta jaaumajim, mλg hësap p'ãmk'iir, mag p'ãwi pãrag deepãaig. Mλg cartadam bat'λ k'itλm gaai pãar wawí chiram, Hëwandam maach t'umaam k'λλn daupii haajem dλita hich jãg hubλ naamk'iir, bλλrjã hewag wëtjujã k'iirjuba. Jãg pãach dau haug wau nλm gaaimua hirua pãar dλijã hλu haajemλn, chadcha hichdëu pãarjã k'ösi sim ha k'ap hapiewaiu.

<sup>13</sup>Mau Babilonia iglesia heem k'λλnaujã pãrag salud deepãi nλm. Hamjã hichab pãarjö hich Hëwandamauchata hich hiek hλk'amk'iir jar hautarr k'λλnau. Mλchdëu jaau chiram hürwia hλk'atarr gaaimua mλ hiewaa haajemuajã pãrag salud deepãi sim, hajapcharan Marcoouma. <sup>14</sup>Cristo gaaimua pãach t'um hãba k'odk'a t'λnaawai hagdaujö pãach k'apeen k'a k'ösi saludaabat.

Pãarjã t'um Cristo dën haawai pãar kôit jëeu chiraaajem, hich mag k'öinaa wënλrramk'iir.

Magdampai hajim keena, pãrag jaaum hig chirarr.

Pedro